

Jud

¹Ɔai Jud, Jesus Kristus iŋanen urat pinein, ƚai Jems tein.

Aŋ ensauta a Anut igiaŋ an, Bai Anut aŋ niŋemi wo imat mok go, Jesus Kristus iŋsen aŋ kagin ipanaŋ dan, niŋemi wo ƚai girek en aŋsam na ƚiganeg ipalu da. ²Anut iŋanen ilo muŋanek, ilo maror agod tamolpein aenta niŋedi wo amat san aŋ lo awan isap yen a.

Tamol a Anut san kagin ta diri dupani na dan sad pitiŋinek

³Ɔai turag muroug, patu pasek e aŋ maŋ da sisem tabig tumado den san fun ƚigire wo ƚai yaes isofutanag da. Gug ƚai ilog isoug gamu ru senamo ƚigire wo da. Ilo rumok e id gun adi tabi den, Anut iŋsen saen kisaek o lian id banid lo igane yan man id ta tibileksa na wa. Fun amaiak niŋen o, idsad ilo rumok abalgirani san niŋen wagai agane wo ru kagin ƚupanaŋ da. ⁴Man dugo, tamol aenta mianuk lo mi aŋ Kris adi lulunam lo disadu ya. Tamol amaiak Anut wagam mok, iŋanen girek lo, daon panek diŋane san o ipilianai a. Iŋ Anut san kagin ta diri dupani na dan, Anut san ilo muŋanek dibilisag mel naon senamo geig ilasa ya. Iŋanen ilo muŋanek ipanad dan san fun man, tinid san ilo masa mi ka turi tupani wak ago dubol da. Ak niŋen o iŋ jeit kagin digane dan Anut uyan ipidinaŋ ak ago dubol da. Agod Jesus Kristus, Tubun en iŋsen Kiŋ an iŋ dumoi da.

⁵Aŋ mel en alonj fufei la ya, Anut wagam Isrel iŋal go Igipta dubiseig diau a. Ago bo man murnag tamolpein sauta a ilod lo ta rumok na yan Anut ipitiŋinaŋ a. Aŋsem alonj la yak gug, kulob naok an aŋ fon mi ilom isafulale san ƚabol da. ⁶Gubak mi eŋel sauta, iŋaned urat malan te yan lo dumado san dumoi a. Anut urat an ipidinaŋ a, ago gug digane san dumoi go aben an dubisei tag, Anut sein nam isubanaig nal fidian tidom tubun lo ago dumado wo ibol a. Ante dumado dop yaup nal tubun ak san saen ilasa dop Anut bitinaek lo idirai a. ⁷Nek ibol Sodom iŋ Gumora da, agod taun a panu uraru giraneŋ na yan sad tamolpein, eŋel adi a jeit kagin digane na yak ago mi iŋ dam ago digane ya. Pein iŋ tamol da sad ilo masa san kagin an dibiseig, tamol iŋ tamol da sad ilo masa san kagin diri se yan lo aupasek an dam digane ya. Amaiak niŋen o Anut aupasek an naon yai pempem yen yau san lo imiriaig inanai pasik a, an man mitilaen ru kagin ipanad san igo ya.

⁸Dal naok an lo mi, tamol an dienamin dop lo sed irawaip tinid dukubuli da, gurman a Anut ipilianai an niñedi wo dumoi da, agod eñel girager amad da yan patud fo uf digane da. ⁹Ak gug saen eñel gurman Maikel iñ Satan da nug dupei, enti Moses san sisanun iñane wa, iñ se pitianoï kagin lo sen yabisa o irer an lo iñsen ilon nam misilane ru lo ta yabi idu na ya, tia, iñ igo ibol, “Tubun en iñsen imisilano wa, ñai man tia ya.” ¹⁰Gug tamol an mel dugo ta duloñ na yan dumisilani da. Agod tinid san melmel a, ibol mel kasik ilod tia yak igo, iñaned ilod iduduwai dop lo duloñ dak igo, tamol nek an dal kisaek an mi lo duloñ dugo digane da. Gug melmel nek a duloñ amaiak daon ipidinaip ipitiñinai a. ¹¹Iñ kagin digane wa! Man dugo, iñ man Kein san ñien aban duri da, moni diñane san man Balaam san aupasek lo diladu ya, agod nek ibol Kora wagam Anut awan lo ipirgini tag daon tubun ak ipani a, nek ago mi tamol an dam daon naon kisaek an mi diñane wa. ¹²Añsam ilo panek san soubul lo iñ man ibol lad luon kasik ak igo ya. Kabelan an fo Kris tamolpein diñaon dop disida banau. Anut ilo sou an ta digane na dop sed ifutuwai da. Iñ nek ibol tim ifurep, timtaen isini yau dak igo woñ a, gug ui ta isi na da. Iñ ibol ai igo ya, nuñodi ifu san saen lo nuñon ta ifu na dak igo ya, ai an dam dubulani a, fun an niñen o iñ saen uraru imat a. ¹³Iñ ibol beig bururuk anda yak igo ya, iñsinaned kagin san miai an ibol beig ibalsunig sabalbal an ilasag kuai isi ak igo ya. Go iñ man ibol patui keit lo gidigidad dutor dak igo mi a. Tidom tubun aben a lo na pempem dumado san an Anut ikubune pidinai la ya.

¹⁴Enok, iñ Adam san dar lo ipalug bagen seven lo ilasa ya, iñ tamol saiadi an niñedi wo profet ru igo ibol, “Ale. Anut iñanen eñel gun ak tausen wei geig dida dupalu wa. ¹⁵Amaiak lo, iñ tamolpein fidian ru lo idiraip iñaned naon ipidinai a. Iñ tamolpein fidian a Anut san kagin ta duri dupani na dan, kagin an lo kulob saiak saiak digane na yan niñen boum ipidinai a. Agod aupasek adi a Anut san kagin ta duri dupani na dan, iñ mi lo misilane ru fidian dusue se yan lo, iñ dam naon boum ipidinai a.” ¹⁶Tamolpein an ñurñur tinadi a, iñ melmel fidian ilasa dan uyan ta dupani na da. Iñsad ilodi fidian man nek dal saian an mi duri wo digane da. Iñ sed ipitianai dan lo awad tubun mi diñiñeñ da. Agod aenta iñsad dal an duri wo ilo ñilañal ru dubol da.

Anj ilo rumok abi sakar a

¹⁷Ak gug ñai turag muroug, ru imug Jesus Kristus iñanen aposel adi dubol ilasa yan ilom isou wa. ¹⁸Iñ ago dubol dugo aloñ a, “Saen wadan lo dop, tamol dilasap kukok amam digane wa. Tamol naok an iñsad ilo masai Anut san kagin ta iri pani na da. Iñsinaned ilo masai an mi duri da.” ¹⁹Tamolpein nek amaiak iñ Kris midaeñ biatitek lo didirai da. Iñ tan en san tamolpein sad kankan mi duri dupani da. An lo Awan Urgan iñ ilod lo tia ya.

²⁰Ak man ŋai turag muroug, saen fidian aŋanem ilom bubem dabai pe, aŋanem ilo rumok gun geig an abi sakar. Agod saen fidian aŋ Awan Urgun san dabai lo agudani wa. ²¹Aŋ sem ititianan o uyanan dop Anut san ilo panek ilon lo amado wa. Aŋ ago agane dop mala nouk amadop, idsad Tubun ak Jesus Kristus iŋanen ilo muŋanek iŋanep kuai te ilasap, an lo iŋiliad pe kumaen pempem yen san lo tau a. ²²Ensauta a idsad ilo rumok niŋen ilod weiwei dan ilom imuŋanai a. ²³Tamolpein aenta yai lo dumado dan, abinawai dop aŋal saltik oŋ a. Aenta iŋaned ilo masa lo ilodi nun anda yan, ilom imuŋanai dop abinawai a. Gug niŋedi wo arer dop, sem kagin ipanaŋ o uyanan a, kabelan iŋsad dal an lo au banau.

²⁴Anut aŋ ititianan siŋaokan dop, au adu san tia ya. Iŋ ka aŋ iŋilian pe aup youm isa dop, muruan tiap iŋsen naon na girager an lo atur a. ²⁵Anut kisaek en mi patud ipasi san, Jesus Kristus idsad Tubun ak lo yaŋan tabisa wa. Iŋ Kiŋ girager aman da, imug imado ya. Agod dabai tubun ak aman da ya. Iŋ melmel fidian sad gurman imado da. Iŋ gubak mi imado ipalug, gamu dam mi imado da. Saen murna dop, ago mi imado yau a. Rumok.